

《那夜·學校二樓女廁》(2016 公開演出版)

時間：晚上

地點：學校 2/F 女洗手間及走廊

(全台暗。)

主播：(幕後音)天水圍一間中學發生一宗罕見嘅懷疑自殺案，一個就讀該校嘅16歲女生被發現倒卧喺學校二樓女廁廁格之內，地下有大量血跡，該女生其後被送往博愛醫院，送院期間證實不治。有老師知道事件後表示震驚。

(環境聲。拍照聲。)

記者：(幕後音)請問你認唔認識死者呢？

老師：(幕後音，哭)佢...佢係好學生嚟架.....年年都考第一.....又乖女.....點解會咁架？  
(哭)

(燈微亮。台上有三格廁格，其中一格被封鎖，並掛著「暫停使用」的字句。曼芝步履蹣跚，掩面哭泣走向另一個打開的廁格)

記者：(幕後音)會唔會係因為讀書壓力太大？

老師：(幕後音)我唔知呀...我唔知呀！(泣不成聲)

(幕後音漸小。曼芝坐在廁板上)

芝：(大叫)呀！

(燈暗。另一燈區亮。包與茄躡手躡足地鑽出。二人手持電筒。茄表情像若有所思，而

包則微微抖顫，彷彿有些害怕)

包：阿茄。不如都係走啦。

茄：驚就咪跟嚟。

包：唔係呢。夜嘛嘛偷走入嚟學校...畀人捉到好大鑊架！隨時記大過。

茄：嘩！我有返學咁耐，乜過都記勻啦！同埋我都有叫過你跟住嚟。係你成隻吊靴鬼咁賴死唔走咋嘛。

包：唔好提個個字呀！聽講真係好猛架！自從單嘢發生咗之後，連出事嗰格廁格都封埋喇。頭先我都同你講啦，有人夜晚聽到二樓女廁有喊聲添。講真，我真係寧願畀人記大過都唔好撞到嗰味嘢.....

茄：我就係想見吓.....

芝：（突然尖叫）唔好呀！（飲泣）

包：嘩！（嚇得拉著阿茄退後）

茄：（掙開包）你留嚟度，我入去睇吓。

包：唔好去呀，阿茄！

（茄不理。以電筒照著前路慢慢走近廁所）

包：阿茄！（不敢向前。前後張望。）你...你等埋我呀！我去攞架鑊！（快步離開）

（燈亮。芝仍在飲泣。茄慢慢走近廁格，以電筒照著芝。）

芝：（被光線嚇到）呀～

茄：（也嚇一跳）嘩！（倒退幾步）

芝：（驚魂稍定）你...你係邊個？

茄：（把手電筒慢慢照向曼芝，看見了對方的容貌。帶點失望）係你？

芝：（這時看到對方容貌）張映雪？

茄：（自言自語）點解會係你.....

芝：張映雪，你做乜會喺度嘅？仲有...你頭先做乜搵電筒照住我呀？

茄：（沒精打采）你叫番我做阿茄喇。（沒好氣）同埋...你仲好講？你夜麻麻匿埋喺廁所嚇人我都未話你！

芝：夜麻麻？（一頓，抬頭望望）係啲！做...做乜咁黑嘅？

茄：咁夜，校工熄咗燈緊係黑啦！

芝：（驚覺）吓？宜家幾點呀？

茄：（用電筒照照手錶）十點半。

芝：（又想哭）死喇！爸爸媽媽見我咁夜都唔返實好擔心喇！（找手提電話，卻找不著）弊！部電話漏咗喺自學中心添！（想走出去找電話）

茄：唔洗去喇。自學中心鎖咗喇。

芝：（慌張地）吓？我啲書同銀包鎖匙都係嗰裡面啲。我有錢點返屋企？

茄：（隨口詢問）你住好遠？

芝：（想哭的聲音）屯門碼頭附近囉。（頓足）死喇！又通知唔到屋企，咁點呀？（想起）你有冇手提呀？可唔可以借我打返屋企？

茄：（冷淡地）冇呀。

芝：（慌張得有點語無倫次）點會冇架？屋企人唔洗搵你架咩？

茄：（有點動氣）我唔同你。我死去邊都有人會理我！

芝：（覺得自己有點說錯話）呃...（冷靜了點）咁...唔知學校鎖門未呢？

茄：（帶點冷酷）鎖埋喇。

（曼芝既徬徨又失望，想到傷心處，又開始抽泣）

茄：（不耐煩，感到討厭）你喊夠未呀？返唔到咪咪返囉！平時以為你係斯文啫，原來仲咁麻煩架！

芝：（漸漸止住哭泣）唔...唔好意思。

茄：（見曼芝反而道歉，也有點不好意思。搔了搔頭）咁又唔使.....

（大家都靜了一會，不知道再可以說甚麼）

茄：（想打破沉默）係呢？你...做乜咁夜仲匿喺廁所嘅？

芝：（有點不想提起，但見茄問到，就如實說出）頭先...頭先我喺自學中心溫書，溫到好劫，忍唔住入黎廁所喊.....

茄：（有點奇怪）你不黝都考第一架嘞，要喊都唔輪到你啦！

芝：你近黎冇返學，所以唔知我今次得第三。

茄：（冷笑）哼！第三！

芝：咩事？

茄：冇~~~你繼續講丫。咁點解鎖晒門、熄晒燈都唔返出去？

芝：頭先喊吓吓吓咁，如果唔係發惡夢都唔知醒。

茄：嗯。

芝：咁張...（轉口）咁阿茄呀，你又咁夜嘅？得你一個？

茄：（心不在焉）唔係，阿包同我一齊返嚟。

芝：阿包？

茄：包楚耀呀！（奇怪）同咗班咁耐，你都唔知我哋啲花名架？我就話成日都唔返學啫，阿包你都唔知架？

芝：我一時省唔起。平時我都唔係咁叫佢嘅。

茄：咁你自己呢？唔通個個都係「林曼芝」、「林曼芝」咁嗌你架？

芝：我爸爸媽媽都叫我做曼芝嘅。

茄：哼！好親切丫。點都好個我老豆嗌我做死妹釘嘅~

芝：吓？你爸爸咁嗌你架！

茄：（語氣帶點懶洋洋）睇佢心情啦~佢鍾意咪嗌吓我個名，唔鍾意咪一巴巴咁車埋嚟囉~不過，佢心情唔好嘅時候多嘅。所以，我都好少嗌佢。

芝：一家人...點會攞成咁架？

茄：嘿。鬼叫我有個衰老豆呀。你好命~從來都唔知世界艱難。睇你呀，都係出身喺啲又有錢，又幸福嘅屋企架啦。

芝：唔係呀。我屋企得爸爸一個出去做地盤，一份人工養起全家，要供我同細佬讀書，好辛苦。所以我一定要考入大學，將來先可以養起成家。

（茄低頭不語。而芝說完後，也低頭默默無言。這時候，包重新從台右的側門出來，手拿著水桶。慢慢地進台，邊走邊緊張兮兮地四處張望。）

包：（小聲地）咪埋嚟呀...我唔驚你架.....我唔驚...我唔驚.....

（包小心翼翼地走近洗手間門口，接著深呼吸一口，鼓起勇氣小聲地叫喚茄）

包：阿茄～你有事冇嘛？阿茄.....

（茄聽到包叫自己，不禁感到很滑稽，然後轉頭向曼芝做一個禁聲的手勢，再突然打開門。）

包：（被嚇一跳，閉上眼，以水桶保護自己）呀～～～

茄：（感到又好氣，又好笑，在包頭上的水桶底上敲了幾下）喂。有鬼都畀你嚇走喇！

包：（慢慢抬起頭看清楚）噓。畀你嚇死喇。（才放下手上的水桶，忽然瞥見茄身後曼芝的身影，立刻指著她）後.....後面.....

（茄搖搖頭，揪起包進洗手間中）

包：（再閉上眼）嘩～唔好呀～～～（隔了一會仍聽不見任何動聽，再打開眼）

芝：（帶點靦腆）你好。

包：（眨兩下眼，再抹一抹雙眼）林曼芝？

芝：係呀。係我。

包：你點解會喺度嘅？

（芝向茄望了一眼，笑了笑，不語。）

包：頭先匿喺廁所嚇人個個就係你呀？

芝：對唔住呀。嚇親你，唔好意思呀。（微微躬身）

茄：又要驚死，又要跟嚟。

包：咁我話過要追到你架嘛，緊係要嚟保護你啦！

茄：嘿！仲話要保護我？都唔知邊個保護邊個！

芝：咁阿包佢雖然驚，但係始終都叫做夠膽返嚟搵你啦！仲帶齊武器添！（忍不住笑）

茄：哈哈！

包：（也傻笑，但忽然省起）咪住！

茄：又點呀？

包：（又慌張起來）頭先...我出到攞架罈個陣，真係見到個好古怪嘅人影！佢披頭散髮  
咁，好恐怖架！

茄：你眼花咋？成日凝住會撞鬼，咪見到咩都當係鬼囉。

包：唔係呢～我真係見到架！

芝：乜真係咁恐怖架？

包：（連連點頭）嗯嗯。

茄：你聽佢吹啦！自己細膽就唔好嚇埋人啦！等我出去睇吓！

包：我講真架！

芝：不如都係睇定啲先啦.....

茄：（望望二人）唉！咁事但啦！我哋留喺度多陣啦。（回到廁格坐下）

（三人一陣靜默。）

芝：（望望茄和包）唔知點解...有你哋喺度...忽然間覺得呢個廁所都幾舒服...幾安全...  
同幾 warm。

包：緊係啦！有我守住個門口，實安全！

茄：嘿！你都幾厚面皮架喎！

包：我老豆由細到大都教我，做人要膽大心細面皮厚.....

茄：可惜你前兩樣都有呢！

包：咩呀？我.....

茄：話時話，呢度女廁嚟架喎，你做乜留嚟度？

包：吓...咁...頭先你搵我入嚟架嘛.....

茄：哦~咁你而家可出返去喇。

包：出...出...出返去？（望一眼門口，甚懼怕）

芝：算啦！我都唔介意佢留低嘅。

包：（喜出望外）嘩！曼芝你真係好人。唔只人靚，仲心地好。第時大把入追！

芝：唔好咁講啦~我今晚返唔到屋企，當係多兩個人陪吓我咋！

包：（奇怪）你返唔到屋企？

芝：嗯。我啲嘢鎖晒喺自學中心，所以冇錢搭車返去。

包：啊~（自作聰明）就係因為咁你就匿埋喺廁所噃。

芝：（見包亂猜，也不多作解釋，只笑了笑）呃...係呢？你哋都仲未講做乜會咁夜返嚟學校嘅？

包：講起就長篇咯！你知啦！我追緊阿茄嘛，咁追女仔就緊係要搵啲話題講吓架啦！講吓講到近嚟學校鬧鬼呢單嘢.....（提起「鬼」字，突然一驚，望望四周。見沒有動靜，稍舒一口氣）佢忽然話想入嚟睇睇，探吓險咁話，咁我咪陪埋佢入嚟囉！

芝：呢個傳聞都傳咗一排喇。

包：係囉！不過阿茄佢咁耐冇返學，未聽過咋嘛！

芝：講起嚟...阿茄你好似冇返學幾個月喇喎。你有乜事丫嘛？

茄：冇.....

芝：你唔介意嘅話，可以同我哋講架。有心事屈埋屈埋好辛苦.....嗰種感覺.....

包：係囉！你講出嚟，有乜事我實幫你！

茄：（猶疑）.....

包：噏，即係咁。我哋能夠夜麻麻喺學校二樓女廁相聚吹水，證明我哋係有緣人！不由今日開始，我哋就結拜做契哥契妹，以後你哋有咩事，我照你哋！

芝：（失笑）契哥契妹？你又話想追阿茄？兄妹亂倫係唔啱架喎！

包：咩呀？我哋呢啲係親上加親啫！

芝：嘻嘻。估唔到你個人咁得意。平時都唔覺嘅！

包：平時我夠覺得你高不可攀啦。又靚又叻。女神喎，我哋呢啲凡夫點敢同你傾計呀？

芝：你又亂講嘢啦！你唔怕阿茄黷你咩？

包：點會啫！我阿包對阿茄忠貞不二。無論有個幾正嘅女神喺我面前，我對阿茄嘅愛都係唔會動搖嘅！

芝：哈哈～～～

包：哈哈～～～

（茄也忍不住微笑。）

芝：同你哋一齊嘅感覺真係好開心。

包：乜你又有唔開心？

芝：為咗讀書...我唔去玩，唔去識朋友，甚至有時連飯都唔食.....當靜低落嚟嗰陣，其實有時都會覺得寂寞.....（一陣靜默）有時我會諗，自己咁辛苦，其實為咗啲乜？如果我出盡全力，都達唔到目標，我會唔會崩潰？我好驚...好驚.....掌握唔到將來嘅感覺...好恐怖.....

（茄望著芝。大家一陣沉默。）

茄：我覺得你同我家姐有啲似。

芝：吓？點解呀？

茄：我講唔到點解...我剩係覺得頭先你嘅表情同佢好似。唔知...你哋係咪同一類人？

芝：咁佢係個點嘅人？

茄：佢...佢都係女神囉！好乖...好叻...好純...好溫柔.....喺佢面前，我有時都有種高攀唔起嘅感覺。（一陣沉默，繼而咬牙切齒）但係...一個咁好嘅女仔，就咁畀個衰老豆害死咗！

包、芝：吓？

茄：（沉默一會）阿包，你仲記唔記得今日同我講個鬼故係點架？

包：我咪話喺三個月前，有個女仔就喺呢個廁格（指指剛才曼芝所在的廁格）死咗，仲

流到一地都係血。之後冇耐，就傳出每晚深夜時份，都會喺呢度傳出陣陣喊聲囉。

（曼芝恍然一驚，不禁回頭看看剛才自己處身的廁格。）

茄：其實嗰個女仔，就係我家姐。

包、芝：吓？

茄：（站起身憶述）當日，我放學返到屋企門口，聽到我老豆同家姐唔知因咩事嘈起上嚟……

（燈光轉亮。開始重演往事。）

父：（幕後音）返嚟呀！衰女！

（霞匆匆走出來，神色傷心。遇見茄）

茄：（奇怪）家姐？

（霞望見茄，停步。此時，父也走出來。）

父：（大喝）衰女！你走？出到去你咪認你係我個女！

霞：（回頭）你嫌我映衰你啫！我唔返嚟咪得囉？

茄：（驚訝）家姐，發生咩事呀？

霞：（沒有直接回應）阿茄。自己照顧自己。（轉身離去）

茄：家姐！（捉住霞的手）你唔好走啦！有乜事返嚟先講好冇？

霞：（甩開茄的手）你唔好跟住嚟！（帶著傷心地）家姐行嘅路...你唔好跟嚟……（快步離開）

茄：家姐！（回頭望父，見父只呆望著霞離去。茄更激動）老豆！你做過啲咩嚟？點解家姐要走？佢不嬲都聽晒你話，你叫佢讀書就讀，做乖乖女就做。從來都有逆過你

意。點解要趕佢走？點解呀？

（父只搖搖頭不語。回頭離去。）

茄：（向父）喂！喂！（慢慢回到現實）我老豆份人不撈又聞塞又臭脾氣，冇乜人頂得佢順……我越諗越撈，又擔心家姐，終於追咗出去，見到家姐已經好快上咗部的士駛走咗。嗰日黃昏，我周街搵佢。（越說越傷心）一路搵，一路搵……（一頓）經過學校門口，見到有部救護車停喺度。聽到啲人講先知家姐出咗事。（沉默一會）我想衝埋去，但係周圍好多人，我埋唔到去。我眼白白睇住架救護車走咗。我發晒慌想追。（忍不住掉眼淚）追呀追，但係追極都追唔到……到我趕到醫院，見到老豆、媽子…媽子喊得好犀利…話畀我知家姐走咗……我當時差啲企唔穩…我撲喺老豆度不停咁打佢。我問佢點解會咁，問佢究竟對家姐做過啲咩，但係佢冇答我、冇出聲…連一句聲都冇出過……之後，我有再理佢，亦都有再返到屋企……我發誓，我以後都唔會再認佢做我老豆！

（包和曼芝聽後，都默默無語，暗暗地為茄和她姐姐的遭遇傷感）

包：就係因為咁，所以你就再冇返學？

茄：嗯。

包：照咁講，傳聞裡面隻鬼係你家姐？

茄：我唔知…但係我唔可以畀家姐死得不明不白。

芝：不如畀我哋幫你丫？

包：（強裝鎮定）係囉。既然佢係你家姐，咁就一定唔會害我哋，咁我都唔使驚啦！我哋一於幫你查啦！

芝：唔知喺學校呢度，搵唔搵到啲蛛絲馬跡，查明呢件事嘅真相呢？

茄：（有些感動）多謝…多謝你哋……

芝：（對茄笑了笑，然後開始思考）事隔幾個月…我諗喺現場都好難搵到啲乜證據……（在洗手間四處走動）就算當日留低啲乜都好，我諗宜家乜都清理晒喇……咁點好

呢？

包：（隨口自語自語）唔通真係要搵阿茄家姐隻鬼魂出嚟問吓？

茄：一於咁話啦！

包：吓？真...真架？

茄：我真係等唔到喇。以前唔知道鬼魂嘅傳聞就話啫，宜家冇呢個線索，我唔可以白白放過！

芝：與其坐喺度白等，主動出擊都未嘗唔係辦法嘅.....

包：咁...咁...但係點搵呀？入咗嚟咁耐都好似冇乜特別咁.....

（燈光突然閃爍。）

包：咦？我亂噏架咋！唔...唔...唔係咁邪呀？

工：（幕後音）邪？嘿！身正豈怕影子斜？

包：邊...邊個？

芝：喺出面呀！

茄：邊個喺出面？快啲出嚟！

工：（披頭散髮地進台，帶點慵懶地說）世界變咯！你哋偷偷走入嚟學校，居然仲可以咁大大聲嘅？

茄：（見對方不似是鬼，鼓起勇氣）你...你究竟係邊個？係人定係鬼呀？

工：（冷笑）嘿...我？嘿嘿...生為異鄉客，死為陌路魂。係人定係鬼？有分別咩？有分別咩.....

茄：都唔知你噏乜！你係咩人？你鬼鬼崇崇匿埋喺出面做乜？

工：嘿。一班鬼鬼崇崇匿喺廁所嘅人，話人哋鬼鬼崇崇咁匿埋.....好，好。既然你哋問到咯，我咪答囉。我係呢間學校嘅夜班校工，你哋可以叫我做忠叔。

茄：（放膽走前兩步質問）校工？我都未見過你嘅？

工：（諷刺地）你上早堂我返夜班，楚河漢界壁壘分明，從未相遇有乜出奇？況且，靚妹～你一年返得幾多日學呀？邊有資格話未見過我？

茄：你識得我？

工：哼！（突然瞪著雙眼望向三人，然後指著包）你！

包：我？

工：過嚟！

包：做...做咩呀？

工：（指著包手上的水桶）水桶。

包：咩...咩呀？

工：水桶，學校物資。擺返嚟！

包：（猶疑一下之後遞過）畀返你囉！

工：（接過水桶後坐下，然後娓娓道出）3E班學生張映雪。2000年6月2日出生。上學期考全級176。操行D級。直至你最後一日返學個日之前，全年一共記咗小過5次，缺點16次。你屋企父母雙全，仲有一個家姐張映霞（一頓），讀5A班。但係好可惜，佢喺4月1日當日逝世，而自從個日之後，你就再冇返過學喇。

茄：（開始激動得顫抖起來）你識我家姐？

工：（沉默一會）係我第一個喺佢臨死前發現佢嘅。

茄：咁你記唔記得...佢...佢有冇講過啲乜？

工：（黯然）記唔記得？嘿！記得！（陷入回憶之中）三十年前黃麗霞，三十年後張映霞，所做過所講過嘅，我都記得清清楚楚。

茄：你又噏乜呀？關三十年前咩事呀？

工：歷史...總係不斷重覆...又重覆.....三十年前又好，三十年後又好，兩個阿霞都一樣咁傻，都一樣做咗件足以令自己跌入地獄嘅錯事。

茄：咩地獄呀？我家姐係女神、係天使嚟架！你唔好亂噏呀！

工：（凝視著茄）咁...你話殺人...係咪要落地獄？

茄：咩殺人呀？你再亂噏信唔我搵你丫嚟？

工：的確係殺人！仲要係殺一個血脈相連，而且完全唔識反抗嘅人.....

茄：（激動地）你收聲！（想撲向校工）

包、芝：阿茄！冷靜啲呀！（捉住茄）

工：（默默走到封閉了的廁格前，悲傷地撫摸封條）本來，我以為我所做過嘅事、阿霞所做過嘅事，永遠都唔會再有人知，然後我可以呃自己，當件事從來都有發生過.....

但係點解？點解偏偏三十年後，世上又有一個阿霞，將歷史又再重演一次，又再提醒我...原來我一直都仲係喺地獄裡面，未曾出過嚟？

茄：你癡線架！有病就去睇醫生啦！喺度亂噏！我家姐咁乖女，你話佢殺人？你唔好屈佢噃！

工：人總係以為塵歸塵，土歸土，死咗就一了百了，殊不知即使個秘密深埋地下三千尺，終歸都有一日會被揭露出嚟.....嘿...哈哈.....好！好！冇得避喇！揭開啦！等我哋一齊受審判啦！（撕開封條，走進去在雜物中拿出一本日記）呢本係你家姐留喺學校的日記簿。你自己睇吓。

（茄一手奪過日記，望著日記封面，但看著又看著，卻總不敢打開）

芝：（柔聲地）不如，畀我哋嚟丫。

茄：（目光既帶著哀愁，又帶著感激地看看曼芝與包）嗯。

芝：（接過日記和電筒，慢慢翻到最後有寫字的幾頁，與包一起看。看到一處，與包對望一眼）2014年3月25號.....（聲音漸小）

（燈區亮。霞進台，面無表情。杰進台快步走向霞）

杰：（緊張）點呀？你係咪真係驗清楚架喇？

霞：我驗第一次都唔信邪，再買一支驗第二次。結果都係一樣。

杰：（左右踱步，然後下定決心）咁生佢出嚟啦！

霞：（突然轉激動）生？咁我仲點返學呀？我哋又點同屋企人講呀？邊個賺錢養呀？住邊呀？你識湊咩？低能架你？以後我點見人呀？

杰：咁唔係點噃？唔通落咗佢咩？人命嚟架！

霞：我唔知呀！你唔好再煩我！總之件事我已經同你交待得清清楚楚。個肚係我嘅，我會自己做決定。你走啦！我哋以後都唔好再見喇！

杰：阿霞！我會負責任架！你信我！

霞：唔使。呢個負責任唔使你負，你亦都負唔起。

杰：霞！

（霞瞪著杰。最終杰亦憤然離去。燈區暗。）

芝：2014年3月31號.....

（另一燈區亮，心與友人在談八卦。霞向心衝前。）

霞：（扯著阿心）八婆！

（霞想攔阿心，但卻被阿心捉住）

心：發咩癲呀你？

霞：夠膽做夠膽認！我啲事係咪你爆出去架？

友：做咩啫？你過多幾個月見肚之後都瞞唔到架啦！阿心早少少講出去，有咩問題先？

霞：（不理友人，向著阿心）枉我當你好姊妹！你將我啲嘢當八卦新聞周圍唱？我講你知嗰陣你仲保證唔同人講，你講大話！

心：嘿！講到講大話，就點都唔及你！全世界都以為你係乖乖女，品學兼優嗎！當正你女神咁。睇怕你都係時候落返神壇啦！

霞：死八婆！

（霞掙扎要打心。心和友人讓霞推跌。）

心：（假意）哎呀！唔好意思喎！冇事丫嘛？顧住個肚呀！有咩事我哋唔覺意做咗殺人兇手就弊喇。

（心和友二人大笑離去。）

霞：（大叫）你同我因住呀！我唔會就咁算架！

(燈區暗。另一燈區亮，霞走進燈區。)

霞：(摸著肚子)BB呀BB。媽咪真係好錫你架。知唔知？BB乖，唔使驚...聽日...媽咪就落咗你啦。放心啦！好快架咋，好快就唔痛架喇。BB乖呀，你唔可以影響媽咪生活架！你公公婆婆不嬲都當媽咪係乖乖女嚟，媽咪唔可以令佢哋失望架！知唔知？乖！好快...好快就唔痛...好快就有事.....(離台)

(燈區暗。)

工：無情，總係比有情容易。為自己打算，點都有要為埋人設想咁辛苦。特別係一個唔識出聲，唔識喊出嚟嘅小生命，冇人會幫佢諗，一個都有。(一頓)嗰日，佢匿埋喺二樓女廁，(霞於此時步履蹣跚地走到台中，滿腳血紅，又顯得身體虛弱)想用自己嘅方法去落個BB.....一模一樣，同三十年前一模一樣.....(霞終於支持不住，跌坐在地上。)好多血...成地都係血.....(校工走近霞的身邊跪倒，扶起霞的上身。茄也想走上前，但好像被隔開一樣無法接近。)一模一樣...一模一樣.....(悲傷地)阿霞.....點解唔肯生佢出嚟？點解？

霞：(氣若遊絲)求吓你...千祈唔好講出去.....我已經令阿爸好失望.....阿爸佢...跪喺地.....跪喺地求我唔好落咗個BB...仲話...會同阿媽幫手湊大佢.....但係我有聽...我淨係諗住唔可以畀其他人知，要好似冇事發生過.....我要塞住阿心把口，等啲人繼續信我...信我...係乖乖女.....求吓你...千祈唔好講出去.....

工：點解？點解又係咁？點解一個二個都要死，然後留低我喺地獄？

茄：(大叫)夠喇！夠喇！唔好再講喇！

(全台燈暗。射燈照著包。)

包：自從嗰日之後，阿茄就返咗屋企。

(另一燈區亮。父進場，茄站在父面前)

父：(柔聲)返嚟喇？阿雪。

茄：嗯。

父：入嚟啦！沖個涼就瞓陣啦。今晚出街食。

茄：嗯。

(燈區暗。)

包：之後阿茄講番，話自己好唔慣喎，仲話好似以前咁一開口就嗌交自然啲！其實佢哋命啫，睇佢個樣不知幾開心！（一頓）

而曼芝佢返到屋企之後，屋企人見佢成晚冇返屋企，鬧佢鬧得好緊要。

(另一燈區亮。芝在當中正低頭被責罵。)

芝：爹哋媽咪，對唔住呀！我以後就算要溫書，都一定會返嚟食晚飯架喇。

包：後嚟到咗學期尾，佢依然考返第三。但係佢冇再喊，仲笑得好開心添。

(芝燦爛地笑。燈區暗。)

包：至於我喇喎～我都有乜變丫。阿媽依然成日都要返工，放低零用錢就任得我點用。

每日逍遙自在，想去邊就去邊。不過，唔知點解呢？雖然我冇人管，又唔憂冇錢用，但係都好似冇阿茄、曼芝佢哋咁開心咁嘅……

—全劇完—